

CINQUANTENARI DE L'ESCOLO DE LA MAR

Istòri brèvo de la Soucieta Pèr Dr Jòusè FALLEN Rèire-Capoulié dóu Felibrige

Escolo dei Felibre de la Mar

L'Escolo dei Felibre de la Mar a celebra soun cinquantenari, lou 29 de Mai 1927, à Santo-Margarido, banlègo de Marsiho, ounte avié fa sei proumiè pas.

D'ami èron vengu de pertout pèr faire fèsto em' elo.

Lou prougramo a agrada i mai groumand, a bèn vougu dire Lou Felibrige (N° 43, p. 19): messo emé sermoun prouvençau remarcable dóu R. P. Vial, taulejado ené brinde calourènt dóu capoulié, dei rèire-capoulié, dei majourau marsihés, dóu majourau Raimbault, encian cabiscòu de l'escolo, dóu deputa Vidal, representant lou Counsèu generau, dóu sendi de la Mantenènço, dei cabiscòu deis escolo e soucieta amigo, etc., e, pèr la bello finido, à la superbo campagno lei Charmereto, felibrejado au plen èr, emé cant, danso enciano e tambourinado; lou cabiscòu, Dr Jòusè Fallen, dins uno charradisso dei mai documentado, remembrè, en seis ate essenciau, La Vido de l'Escolo de la Mar durant sei cinquato an: aqeste raconte fau pas que si perde, e lou veici:

Segne Capoulié,
Meidame, Messiés,

Pèr la candeloue, à la grand messo, o lou dissato sant, quand lei campano vènon de Roumo, l'a 'n grand counours de gènt farot, meireto radiouso, meirino trelusènto de daurèio, e lei grand, e lei vesino; e tóuteis apètugado, au moumen dóu gloria, pauson au sòu l'enfantoun deja grandet qu'acoumpagnon e li fan faire sei proumié passet: li dounon lei pèd.

Uno ceremounié d'aquéu biais s'es facho àtreti-fes dins aqeste lue flouri; es en sa remembranço que, gràci a l'acuiènço de l'oustalado Courtés, — que pouerto tant bèn soun noum, — si trouvan reüni vèi à la Charmereto.

Lou Felibrige, founda à Fouent-Segugno, lou 21 de Mai 1854, avié trachi d'abord un pau arràgi, puei, en 1862, s'èro douta d'un estatut de pouèto que planavo un pau dins leis èr.

Mai en 1876 vouguè si douna 'no coustitucien plus soulido. Lou grand pouèto Frederi Mistral avié batu lou rampèu, e souto sa presidènci, lou 21 de Mai, en Avignoun, dins l'enciano capello dei Chivalié de Rodo, s'acampèron tóutei lei letru que la boulegadisso prouvençalo interessavo; Louis Astruc, Carle Bistagno, Marius Bourrelly, Frederi Estre, Jòusè Huot, Vitour Lieutaud, li representavon Marsiho.

Si voutè 'n estatut nouvèu: s'establissè lou Counsistòri e lei majourau d'uno part, lei mantenènço e leis escolo d'autro part; e si decidè que dins lei grand cèntrè uno escolo, coumpausado de sèt mèmbrè pèr lou mens, avié d'èstre creado.